



UPA 2017/20
Nuuk, 26.04.2017
Bendt B. Kristiansen

Procent aaqqiissutissaq pillugu Inatsisartut inatsisaat nr. xx, xx.xxx 2017-imeersoq.

(Aningaasaqarnermut Akileraartarnermullu Naalakkersuisoq)

Inuiaqatigiinni naligiinnginnerup annertusigaluttuinnarnerani akiliisinnaassutsikkut oqimaattorsiornerusut oqilisaavigineqarnissaat Inuit Ataqatigiinnit oqariartuutiguarivarput. Angajoqqaat meerartallit, kisimiittutut pilersuisut akunattumillu isertitaqqortussusillit eqqarsaatigalugit.

Inuiaqatigiinni akissaatikittumik inissisimasut 200.000kr. ataallugu isertitaqartartut inuiaqatigiinni sulisinnaasut affaasut taakkuupput ulluinnarni atukkamikkut oqilisaavigineqaqqaartariaqartut, qangali taamaattuarsimagaluarpoq, taamaattoq Inuit Ataqatigiinni tamanna amerlanerussuteqarfigisarsimangilarput.

Maanna Naalakkersuisut aningaasat pisortanit tunniunneqartartut nalimmasarneqartalernissaannik siunnersuuteqarput, Inuit Ataqatigiinnit oqarusupugut kiisami, qujanarlu, inuiaqatigiit pillugit.

Ullumikkummi aningaasat pisortanit tunniunneqartartut ilaat nalimmasarneqarneq ajorput, assersuutitut meeqqanut tapit meeqqanullu akilersuutit. Tamatuma kinguneranik aningaasat tunniunneqartartut pisissutigineqarsinnaanerit annikilliertortarluni. Tamannalu ajornartorsiut innuttaasut oqariartuutigiuartarpat.

Assersuuteqariarutta utoqalinermi pension-eqartarnermi aningaasat tunniunneqartartut nalimmassarneqartarput.

Aningaasat tunniunneqartartut ilaasa nalimmassarneqartannginnerisa kinguneranik inuiaqatigiinni naligiinnginnerup annertusiartortup suli annertuneruleriartorneranik kinguneqarpoq, taamaattumik Inuit Ataqatigiit iluarisimaarparput Naalakkersuisut ajornartorsiut nalimmassarniarlugu maanna iliuuseqalermata manna inatsisissatut siunnersuut aqqutigalugu.

Taamak oqaaseqarluta suliaq aappassanneerreqannginnarani Aningasaqarnermut Akileraartarnermullu Ataatsimiititaliamut suliassanngortinneqassasoq inassutigaarput.

Qujanaq.